

Campeonato di futbol femenino dedica na Ing. Gregory Engelbrecht



ORANJESTAD- Awe e campeonato di futbol femenino ta cuminsa na stadion di Frans Figaroa na Noord na unda pa 6'or di atardi lo bay tin un desfile di tur e equiponan participante. Ta spera tur team/hungador pa ta presente pa 5.30 na C.D. F.F. na Noord. Lo cuminsa pa 6.45 cu dos wega simultaneo, e campeon di 2007/2008 Savaneta Stars lo enfrenta Santa Fe mientras cu Brazil Jrs lo hunga cu The Rose. Despues lo sigui cu un wega di adulto, entre e campeonnan di 2007/2008 Savaneta Stars cu lo enfrenta e Seleccion U16. Mester bisacue campeonato di futbol femenino di e aña aki lo ser dedica na sr. Gregory Engelbrecht kende ta e persona clave cu a start bek cu e futbol femenino na Aruba. Manera nos tur sa Sr. Engelbrecht a caba di haya

un funcion nobo den e ramo futbol como Development Manager Americas pa e Federacion Mundial di Futbol, F.I.F.A, na unda el lo mester muda pa Zurich, Suiza, den e luna benidero. Nos a haya un autobiografia di Sr. Gregory Engelbrecht cu nos kier a comparti cu nos lectornan. Gregory a nace na Seroe Colorado riba 1 di December 1971. Gregory a atende Colegio Sagrado Curazon na Savaneta y na 1979 Gregory a cuminsa hunga futbol pa S.V. La Fama den categoria 'Aspirant'. Su prome entrenador tabata Puppy Diaz. Banda di futbol Gregory tabata practica diferente deporte na scol, entre otro volleyball, tennis, landamento, futbol di sala y baseball. Pero futbol semper a keda su deporte preferi. Su prome posicion pa

hunga tabata 'links binnen'. Gregory a hunga su prome wega den Division Honor pa S.V. La Fama cu 15 aña, riba posicion di 'rechts back' y den medio campo unda cu e la haya oportunidad pa hunga cu hugadornan conoci manera Adri Martilia. Gregory a wordo selecta pa seleccion di Aruba na diferente edad y a representa Aruba na varios ocasion den categoria menor, junior y senior. Na edad di 18 aña Gregory bira manager y hungador di su prome equipo (di futbol sala), "A.S.K. ESSO". Na 1990 Gregory a bay Hulanda pa continua su estudio. Despues di su estudio di Werktuigbouwkunde y Technische Bedrijfskunde na Enschede Gregory a bai traha den randstad y a bay biba na Leiden.

Sigui lesa pagina 15

Continuacion di pagina 14

Durante su temporada na Leiden Gregory tabata hungador, coach y manager di un equipo di futbol multi cultural. Gregory a bolbe Aruba na 2004 y a regresa na su equipo S.V. La Fama como hungador y miembro di Directiva despues como assistant coach. Na 2005 Gregory a wordo eligi como miembro di Directiva di Arubaanse Voetbal Bond. Na 2005 Gregory a obtene su diploma di KNVB Trainer Coach 3 (TC3) organiza pa AVB y duna pa Sr. Azing Griever. Durante 2005 Gregory a sera conoci cu futbol femenino pa medio di Sr. Richard Vermeulen. Na november 2005 Gregory y Richard a wordo nombra como coach di seleccion futbol femenino y na mei 2006 a participa na weganan eliminatorio pa mundial contra di Suriname y Antias Hulandes. Despues di e periodo aki Gregory a wordo nombra como 'Development Officer' di AVB pa futbol femenino di Aruba. Na Augustus 2006 Gregory a forma e prome "Comision Futbol Femenino di AVB"

hunto cu Sr. Frans Dijkhoff y Sr. Rudy Carti y na October 2006 a organisa e prome campeonato di futbol femenino directamente bou manego di AVB. Na fin di 2006 Gregory a stop di hunga futbol den Division Honor pa S.V. La Fama pa motibo di lesion y a cuminsa dedica mas tempo na su trabou den directiva di AVB y desaroyo di campeonato y seleccionnan di futbol femenino. Na 2007 a amplia e Comision Futbol Femenino cu Sra. Mildred Martinez-Wever y Sra. Rosemin Croes y a introduci e prome campeonato pa categoria di futbol femenino infantil y hubenil. Como headcoach di seleccion U-15 Gregory a participa na e prome torneo internacional di futbol femenino pa hungadornan bou di 15 aña, na Trinidad. Mirando cu e gana di hunga futbol no a kita, na 2008 Gregory a bai forma parti di equipo veterano 'Toke'. Dia 5 di October Gregory a hunga su ultimo wega oficial pa SV La Fama. Desde November 2008 Gregory cuminsa traha pa FIFA, na Zurich, como 'Development Manager' pa Area di Caribe y Medio-America y Sur-America.